

功德專伸視控 三界萬靈十方真宰夫婦行年本命元辰星君
伏冀保佑夫婦身宮康泰壽算延長九歷時中吉祥如意者

寶祐四年正月 日弟子張彥珩

謹題

法苑珠林卷第九十三

羅三

大唐上都西明寺沙門釋道世字玄暉撰

酒肉篇第九十三 此有三部

述意部 飲酒部 食肉部

述意部第一 夫酒為放逸之門大聖知其
苦本所以遠酣肆離酒緣棄醉朋近法友出

昏門入醒境肉是斷大慈之種大聖知其殺
因所以去腥臊淨身口噉蔬菜澄心神招慈
善感延年故俗書禮記云見其生不忍其死
聞其聲不食其肉斯亦不殺之義也若使噉
食酒肉之者即同畜生豺狼禽獸亦即具殺
一切眷屬食噉諸親反讎怨報歷劫長夜無

有窮已如經論說有一女人五百世害狼兒
狼兒亦五百世害其子又有女人五百世斷
鬼命根鬼亦五百世斷其命根故知經歷六
道備受怨報或經為師長或是父母或是兄
弟或是姊妹或是兒孫或是朋友今是凡身
各無道眼不能分別還相噉食不自覺知噉
食之時此物有靈即生瞋恨還成怨讎向到
至親反變成怨如是之事豈可不思暫爭舌
端一時少味永與慈親長為怨對可為痛心
難以言說是故涅槃經云一切肉者悉斷及
自死者自死猶斷何況不自死者又楞伽經
云為利殺眾生以財網諸肉二業俱不善死
墮叫呼獄何謂以財網肉陸設置罟水設網
罟此是以網網肉若於屠殺人間以錢買肉
此是以財網肉若今此人以財網肉者習
惡律儀捕肉眾生此人為當專自供口亦復
別有所擬若別有所擬向食肉者豈無殺分
何得云我不殺生此是灼然違背經文斷大

慈種障不見佛也 飲酒部第二

述曰此之一教有權有實權則漸誘之訓以輕脫重初開無犯據其障理非無其過若約實教輕重俱禁始末不犯是名持戒初據權說者故未曾有經云余時國王太子名曰祇陀聞佛所說十善道法果報無窮長跪叉手

白佛言佛管令我受持五戒今欲還捨所以者何五戒法中酒戒難持畏得罪故世尊告曰汝飲酒時為何惡耶祇陀白佛國中豪強時時相率賣持酒食共相娛樂以致歡樂自無惡也何以故得酒念戒無放逸故是故飲酒不行惡也佛言善哉善哉祇陀汝今已得

羅 朱林九三

二

智慧方便若世間人能如汝者終身飲酒有何惡哉如是行者乃應生福無有罪也若人飲酒不起惡業歡喜心故不起煩惱善心因緣受善果報如持五戒何有失乎飲酒念戒益增其福先持五戒今受十善功德倍勝十善報也時波斯匿王白佛言世尊如佛所說

心歡善時不起惡業名有漏善者是事不然何以故人飲酒時心則歡喜歡喜心故不起煩惱無煩惱故不行惱害不害物故三業清淨清淨之道即無漏業世尊憶念我昔遊行獵戲忘將厨宰於深山中覓飢欲食左右荅言王朝去時不被命勅令將厨宰即時無食

我聞是語已走馬還宮教令索食王家厨監名脩迦羅脩迦羅言即無現食今方當作我時飢逼忿不思惟勅臣斬煞厨監臣被王教即共議言簡括國中唯此一人忠良直事今若煞者更無有能為王監厨稱王意者時末利夫人聞王教勅煞脩迦羅情甚愛惜知王

飢乏即令辨具好肉美酒沐浴名香莊嚴身軀將諸妓女往至我所我見夫人裝束嚴麗將從妓女好酒肉來瞋心即歇何以故末利夫人持五戒斷酒不飲我心常恨今日忽然將酒肉來共相娛樂展釋情故即與夫人飲酒食肉作眾妓樂歡喜娛樂恚心即滅夫人

畢

朱九十三

三

知我忘失怒意即遣黃門輒傳我命令諸外臣莫煞厨監即奉教旨我至明旦深自悔責愁憂不食顏色顛顛夫人問我何故憂愁為何患耶我言吾因昨日為飢火所逼瞋恚心故煞修迦羅自計國中更無有人堪監我厨如脩迦羅者為是之故悔恨愁耳夫人笑曰其人猶在願王莫愁我重問曰為實如是為戲言耶答言實在非戲言也我令左右喚厨監來使者往召須臾將來我大歡喜憂悔即除王白佛言末利夫人持佛五戒月行六齋一日之中終身五戒已犯飲酒妄語二戒八齋戒中頓犯六戒此事云何所犯戒罪輕耶重耶世尊答曰如此犯戒得大功德無有罪也何以故為利益故如我前說夫人修善九有二種一有漏善二無漏善末利夫人所犯戒者入有漏善不犯戒者名無漏善依語議者破戒修善名有漏善依義語者九心所起善皆無漏業王白佛言如世尊說末利夫人

飲酒破戒不起惡心而有功德無罪報者一切人民亦復皆然何以故我念近昔舍衛城中有諸豪族利利王公因小諍竟乃致大怨各各結謀與兵相伐兩家並是國親非可執錄紛紜鬪戰不從理諫深為憂之復自念言昔太子時共大臣提韋羅相忿情實不分意欲誅滅因太后與酒飲已情和思惟是已即勅忠臣令辨好酒及諸甘饌又使宣令國中豪族群臣士民悉皆令集欲有所論國中大事諸臣諍競兩徒眷屬各有五百應召來集於王殿上莊嚴大樂王勅忠臣辦瑠璃椀椀受三升諸寶椀中盛滿好酒我於眾前先擊

一椀王曰今論國事想無異心今當人人辦此一椀甘露良藥然後論事咸言唯諾作唱大樂諸人得酒并聞音樂心中歡樂亡失讎恨因酒息諍而得太平此豈非是酒之功也竊見世間窮貧小人奴客婢使夷蠻之人或因節日或於酒店聚會飲酒歡樂心故不須

羅

朱九十三

四

人教各各起憊未得酒時都無是事是故當知人因飲酒則致歡樂心歡樂時不起惡念不起惡念則是善心善心因緣應受善報猶猴得酒尚能起憊況於世人如世尊說施善善報施惡惡報末利夫人皆由前身以好施人故今得好報世尊云何今持五戒月行六

齋六齋之日不得莊嚴香華服飾作唱妓樂又復不聽附近夫婿愛好之姿竟何所施徒云其功豈非苦也佛告王曰大王所難非不如是末利夫人在年少時若我不勅令受戒法修智慧者云何當有今日之德以能得度復度王身如斯之功復歸誰也 述曰此第

二約其實說輕重不犯真名持戒故大聖知時量機通塞通則開禁隨時量前損益如匿王殺厨監太子欲殺其父此並因酒忘忿得全身命免其大罪以輕脫重不受累殃然非無飲酒之各來報之罪不得見有前開遂即雷同恣犯各須量其教意復省己身行德優

劣得預聖人斯匿末利開禁以既不同此即須依經纖毫勿犯最為殊勝故四分律云是我弟子者乃不以草頭滴酒入口何況多飲是故咽咽結提 又成論問云飲酒是實罪耶答曰非也所以者何飲酒不為惱眾生故而是罪因若人飲酒則開不善門以能障定

宋九十三

五

及諸善法如殖眾果必有牆障故知酒過如果無園 又優婆塞經云若復有人樂飲酒者是人現世喜失財物身心多病常樂鬪諍惡名遠聞喪失智慧心無慚愧得惡色力常為一切之所呵責人不樂見不能修善是名飲酒現世惡報捨此身已處在地獄受飢渴等無量苦惱是名後世惡業之果若得人身心常狂亂不能繫念思惟善法是一惡因緣力故令一切外物資生悉皆具爛 又長阿舍經云其飲酒者有六種失一者失財二者生病三者鬪爭四者惡名流布五者恚怒暴生六者智慧日損又智度論飲酒有三十五

失如前受戒篇說 又沙弥尼戒經云不得飲酒不得嗜酒不得嘗酒酒有三十六失失道破家危身喪命皆悉由之牽東引西持南著北不能諷經不敬三尊輕易師友不孝父母心閉意塞世世愚癡不值大道其心無識故不飲酒欲離五陰五欲五蓋得五神通得

度五道故不飲酒又薩遮尼乳子經偈云

飲酒多放逸 現世常愚癡 忘失一切事

常被智者呵 來世常闇鈍 多失諸功德

是故黠慧人 離諸飲酒失

又十住婆沙論問曰若有人捨施酒未知得罪以不答曰施者得福受者不得飲故論云

是菩薩或時樂捨一切須食與食須飲與飲若以酒施應生是念今是行檀時隨所須與後當方便教使離酒得念智慧令不放逸何以故檀波羅蜜法悉滿人願在家菩薩以酒施者是則無罪 又梵網經云若自身手過酒器與人飲酒者五百世中無手何況自飲

不得教一切人飲及一切衆生飲酒況自飲酒 又優婆塞五戒相經云佛在支提國跋陀羅婆提邑是處有惡龍名菴羅婆提陀甸暴惡害人無人得到其處象馬無能近者乃至諸鳥不得過上秋穀熟時並皆破滅時有長老莎伽陀羅漢此丘遊行支提國漸到跋

羅

卷九十三

六

陀羅波提邑過是夜已晨朝著衣持鉢入村乞食時聞此邑有惡龍名暴害人鳥獸及破滅秋穀聞已乞食到菴婆羅提龍住處衆鳥樹下敷座具大坐龍聞衣氣即發瞋恚從身出煙長老莎伽陀即入三昧以神通力身亦出煙龍倍瞋恚身上出火莎伽陀復入火光三昧身亦出火龍復雨雹莎伽陀即變雹作釋俱餅髓餅等龍復放霹靂莎伽陀變作種種歡喜九龍復雨弓箭刀稍莎伽陀即變作優鉢羅華波頭摩華等龍復兩毒蛇蜈蚣土虺蚰蜒莎伽陀即變作優鉢羅華瓔珞瞻蔔華瓔珞等如是等龍所有勢力盡現向莎伽

陀皆不能勝即失威力光明莎伽陀知龍力盡不能復動即變作細身從龍兩耳入從兩眼出已從鼻入從鼻入已從口中出在龍頭上往來經行不傷龍身今時龍見如是事已心即大驚怖毛豎合掌向莎伽陀言我歸依汝莎伽陀答言汝莫歸依我當歸依我師佛

龍答言我從今歸依三寶知我盡形作佛優婆塞是龍受三自歸作佛弟子已更不復作如先凶惡事諸人及鳥獸皆得到所秋穀不傷名聲流布諸國皆知長老莎伽陀能降伏惡龍折令善因莎伽陀名聲流布諸人皆作食傳爭請之是中有一貧女人信敬請得莎

羅

七

伽陀是女為辨蘓乳糜食之女人念思惟是沙門噉是蘇乳糜或當冷發便取似水色酒持與莎伽陀沙伽陀不看便飲飲已為說法便去過向寺中今時酒勢便發近寺門邊不覺倒地僧伽梨衣漉水囊鉢杖等各在一處身在一處醉無所覺佛與阿難行到是處見

是比丘知而故問阿難此是何人答言世尊此是長老莎伽陀佛即語阿難是處為我敷座辨水集僧阿難受教敷座辨水集僧已白佛言僧已集佛自知時佛即洗足坐已問諸比丘汝等曾見聞有龍名菴婆羅提陀匈暴惡害先無有人到其住處乃至鳥獸無能到上秋穀熟時破滅諸穀莎伽陀能折伏令善鳥獸得到泉上是中有見聞者言見聞此事佛語諸比丘於汝意云何此善男子莎伽陀今能折伏蝦蟇不答言不能佛言聖人飲酒尚如是失何況凡夫如是過罪皆由飲酒今從自後若言我是佛弟子者不得飲酒乃至小草頭一滴亦不得飲佛種種呵責飲酒過失已依律因此比丘便制不飲酒戒問曰未審天上有酒味不答曰無實麴米所造之酒但有業化所作酒也故正法念經云彼夜摩天男共天女衆入池遊戲同飲天酒離於醉過現樂功德味觸色香皆悉具足其中諸

天有以珠器而飲酒者受用蘇陀之食色觸香味皆悉具足彼如是念此水為酒令我得飲即於念時皆是天酒離於醉過天既飲之增長勝樂善業力故心生歡喜然彼諸天自業力故如是受樂有鳥名為常樂見彼諸天在歡喜河而飲酒故為說偈言

沒入放逸海 貪著諸境界 此酒能迷心

何用復飲酒 為境界火燒 不知作不作

園林主貪心 何用復飲酒 彼常樂鳥

見樂飲酒天在河飲酒為調伏故如是說偈

又正法念經閻羅王責疏罪人說偈云

酒能亂人心 令人如羊等 不知作不作

如是應捨酒 若酒醉之人 如死人無異

若欲常不死 彼人應捨酒 酒是諸過處

恒常不饒益 一切惡道階 黑闇所在處

飲酒到地獄 亦到餓鬼處 行於畜生業

是酒過所誑 酒為毒中毒 地獄中地獄

病中之大病 是智者所說 若人飲酒者

無因緣歡喜 無因緣而瞋 無因緣作惡

於佛所生癡 壞世出世事 燒解脫如火

所謂酒一法 若人能捨酒 正行於法戒

彼到第一處 無死無生處

問曰無病飲得罪有病開飲不答曰依四分

律實病餘藥治不差以酒為藥者不犯 問

曰開服幾許答曰依文殊師利問經云若合

藥醫師所說多藥相和少酒多藥得用 又

舍利弗問經云舍利弗白佛言云何世尊說

遮道法不得飲酒如等歷子是名破戒開放

逸門云何迦蘭陀竹園精舍有一比丘疾病

經年危篤將死時優波離問言汝須何藥我

為汝覓天上人間乃至十方是所應用亦皆

為取答曰我所須藥是違毗尼故我不覓以

至於此寧盡身命無容犯律優波離言汝藥

是何答曰須酒五升優波離曰若為病開如

來所許為乞得酒服已消差差已懷慚猶謂

犯律往至佛所懇懃悔過佛為說法聞已歡

朱九三

九

喜得羅漢道佛言酒有多失開放逸門飲如
 亭歷子犯罪已積若消病苦非先所斷 述
 曰不得見前文開籠通揔飲必須實病重困
 臨終先用餘藥治皆不差要須酒和得差者
 依前方開比見無識之人身力強壯日別馳
 走不依眾儀少有微患便長情貪不護道業
 妄引經律云佛開種種湯藥名衣上服施佛
 及僧因公傍私詭誑道俗是故智人守戒如
 命不敢犯之是故薩遮尼軋子經偈云
 酒為放逸根 不飲閉惡道 寧捨百千身
 不毀犯法教 寧使身乾枯 終不飲此酒
 假使毀犯戒 壽命滿百年 不如護禁戒
 即時身磨滅 決定能使差 我猶故不飲
 況今不定知 為差為不差 作是決定心
 心生大歡喜 即獲見真諦 所患即消除
 當知眾生病者皆由貪瞋我慢為因從
 因有果得此苦報非由不得藥酒病不得差
 故涅槃經云一切眾生有四毒箭則為病因

何等為四一貪欲二瞋恚三愚癡四憍慢若
 有病因則有病生所謂愛熱肺病上氣吐逆
 膚體瘡瘡其心悶亂下痢噦噎小便淋瀝眼
 耳疼痛腹背脹滿顛狂乾消鬼魅所著如是
 種種身心諸病若識病本斷惡修善三世苦
 報永除不受若不觀理縱用天下藥酒所治
 其病轉增難可得差 又毗尼母經云尊者
 弥沙塞說曰莎提比丘少小因酒長養身命
 後出家已不得酒故四大不調諸比丘白佛
 佛言病者聽甕上嗅之若差不聽嗅不差者
 聽用酒洗身若復不差聽用酒和麵作餅食
 之若復不差聽酒中自漬 又新婆沙論云
 如契經尊者舍利子於憍薩羅國住一林中
 時有活命出家外道亦住彼林隣近尊者去
 林不遠諸村邑中有時廣設四月節會時彼
 外道巡諸村邑飽食猪肉恣情飲酒竊持殘
 者還至林中見舍利子坐一樹下酒所昏故
 起輕憊心我今與彼雖俱出家我獨富樂而

羅 卷九十三

十

彼貧苦尋趣尊者作是頌曰 我已飽酒肉
復竊持餘來 地上草木山 皆視如金聚
時舍利子聞已念言此死外道都無慚愧乃
能無賴說此伽他我今亦應對彼說頌作是
念已即說頌言 我常飽無相

恒住空定門 地上草木山 皆視如唾處

今此頌中尊者舍利子作師子吼說三解脫
門謂於初句說無相解脫門於第二句說空
解脫門於後二句說無願解脫門

食肉部第三 述曰此之一教亦有權實言
權教者據毗尼律中世尊初成道為度麁惡
凡夫未堪說細且於漸教之中說三種淨肉

離見聞疑不為已殺鳥殘自死者開聽食之
先鹿後細漸令離過是別時之意不了之說
若據實教始從得道至涅槃夜大聖懇勸始
終不開 又涅槃經云一切衆生聞其肉氣
皆悉恐怖生畏死想水陸空行有命之類悉
捨之走咸言此人是我等怨是故菩薩不習

食肉為度衆生示現食肉雖現食之其實不
食但諸衆生有執見者不解如來方便說意
便即偏執毗尼局教言佛聽食三種淨肉亦
謗我言如來自食彼愚癡人成大罪障長夜
墮於無利益處亦不得見現在未來賢聖第
子況當得見諸佛如來大慧諸聲聞人等常

羅

朱林九十三

十一

所應食米麵油蜜等能生淨命非法貯畜非
法受取我說不淨尚不聽食何況聽食肉血
不淨耶非直食肉壞善障道乃至邪命諛曲
以求自活亦是障道 又文殊師利問經云
若為已殺不得噉若肉如材木已自腐爛欲
食得食若欲噉肉者當說呪呪 多經唯訛

是如阿捺摩阿捺摩 我無我無 阿視婆多阿視婆

多 此言無壽命 那舍那舍 失此言陀呵陀呵 燒燒

婆弗婆弗 破此言僧柯慄多弭 有為言莎呵 除殺

去 此呪三說乃得噉肉飯亦不食何以故

若無思惟飯不應食何況當噉肉佛告文殊
師利以衆生無慈悲力懷殺害意為此因緣

故斷食肉若能不懷害心大慈悲心為教化一切衆生故無有過罪 問曰酒是和神之藥肉為充飢之膳古今同味今獨何見鄙而不食若使佛教清禁居喪札制即如對於嚴君勅賜俗食豈關僧過拒而不食耶答曰貪財喜色貞夫所鄙好膳嗜美廉士所惡割情從道前賢所歎抑慾崇德往昔同嗟況肉由殺命酒能亂神不食是理寧可為非縱逢上抑終須嚴斷雖違君命還順佛心 問曰肉由害命斷之且然酒不損生何為頻制若使無損計罪無過言非飲漿食飯亦應得罪而實不介酒何偏斷答曰結戒隨事得罪據心肉體因害食之即罪酒性非損過由弊神餘處生過過生由酒斷酒即除所以遮制不同非謂酒體是罪 問曰罪有遮性酒體生罪今有耐酒之人能飲不醉又不弊神亦不生罪此人飲酒應不得罪斯則能飲無過不能招咎何關斷酒以成戒善可謂能飲耐酒當

各持戒少飲即醉是大罪人答曰制戒防非本為生善戒是上善身口無違緣中止息遮性兩斷乃名戒善今耐酒之人既不亂神未破餘戒實理非罪正以飲生罪因外違遮教緣中生犯仍名有罪以乖不飲猶非持戒第一據實有損者依經食肉之人有十種過失第一明一切衆生無始已來皆是已親不合食肉故入楞伽經云我觀衆生輪迴五道同在生死共相生育適為父母兄弟姊妹若男若女中表內外六親眷屬或生餘道善道惡道常為眷屬以是因緣我觀衆生更相噉肉無非親者由食肉味適牙相噉常生害心增長苦業流轉生死不得出離佛說是時諸惡羅刹聞佛所說悉捨惡心止不食肉適相勸發菩提之心護衆生命過自護身離切惡諸肉不食悲泣流淚白言世尊我聞佛說諦觀六道我所噉肉皆是我親乃知食肉衆生是我大怨斷大慈種長不善業是大苦本我

從今日斷不食肉及我眷屬亦不聽食如來弟子有不食者我當晝夜親近擁護若食肉者我當與作大不饒益大慧羅刹惡鬼常食肉者聞我所說尚發慈心捨肉不食況我弟子行善法者當聽食肉者當知即是衆生大怨斷我聖種大慧若我弟子聞我所說

不諦觀察而食肉者當知即是旃陀羅種非我弟子我非其師 第二明食肉衆生見者皆悉驚怖故不應食如彼經說食肉之人衆生聞氣悉皆驚怖逃走遠離是故菩薩修如實行爲化衆生不應食肉譬如旃陀羅獵師屠兒捕魚鳥人一切行處衆生遙見作如是

羅

朱九三

十三

念我今定死而此來者是大惡人不識罪福斷衆生命求現前利今來至此爲覓我等今我等身悉皆有肉是故今來我等定死大慧由人食肉能令衆生見者皆生如是驚怖大慧一切虛空地中衆生見食肉者皆生恐怖而起疑念我於今者爲死爲活如是惡人不

修慈心亦如豺狼遊行世間常覓肉食如牛噉草蟻蝗逐糞不知飽足我身是肉正是其食不應逢見即捨逃走離之遠去如人畏懼羅刹無異 第三明食肉之人壞他信心是故不應食肉如彼經云若食肉者衆生即失一切信心便言世間無可信者斷於信根是

故大慧菩薩爲護衆生信心一切諸肉悉不應食何以故世間有人見食肉故謗毀三寶作如是言於佛法中何處當有真實沙門婆羅門修梵行者捨於聖人本所應食食於衆生猶如羅刹斷我法輪絕滅聖種一切皆由食肉者過是故大慧我弟子者爲護惡人毀

謗三寶乃至不應生念肉想何況食噉也 第四明慈心少欲行人不應食肉如彼經說菩薩爲求出離生死應當專念慈悲之行少欲知足厭世間苦速求解脫若捨憤鬧就於空閑住屍陀林阿蘭若處塚間樹下獨坐思惟觀諸世間無一可樂妻子眷屬如枷鎖想

宮殿臺觀如牢獄想觀諸珍寶如糞聚想見諸飲食如膿血想受諸飲食如塗癰瘡想趣得存命繫念聖道不為貪味酒肉葱韭蒜薤臭味悉捨不食若如是者是真修行堪受一切人天供養若於世間不生厭離貪著諸味酒肉薰辛皆便噉食不應受於世間信施也

第五明食肉之人皆是過去曾作惡羅刹由習氣故今故貪肉是故不應食肉也如彼經說有諸衆生過去曾修無量因緣有微善根得聞我法信心出家在我法中過去曾作羅刹眷屬虎狼師子猫狸中生雖在我法食肉餘習見食肉者歡喜親近入諸城邑聚落塔

朱九三

十四

寺飲酒噉肉以為歡樂諸天下觀猶如羅刹爭噉死屍等無有異而不自知已失我衆成羅刹眷屬雖服袈裟剃除鬚髮有命看見心生恐怖如畏羅刹此明食肉皆是過去曾作羅刹師子虎狼猫狸中來故應裁斷也 第六明食肉之人學世呪術尚不得成況出世

法何由可證是故行者不應食肉如彼經說世間邪見諸呪術師若其食肉呪術不成為成邪術尚不食肉況我弟子為求如來無上聖道出世解脫修大慈悲精勤苦行猶恐不得何處當有如是解脫為彼癡人食肉而得其報是故大慧我諸弟子為求出世解脫樂

故不應食肉也 第七明衆生皆愛身命與己無別是故行者不應食肉如彼經說食肉能起色力貪味人多貪著應當諦觀一切世間有身命者各自寶重畏於死苦護惜己身人畜無別寧當樂存芥野干身不能捨命受諸天樂何以故畏死苦故以是觀察死為大

苦是可畏法自身畏死云何當得而食他肉是故大慧欲食肉者先自念身次觀衆生不應食肉也 第八明食肉之人諸天賢聖皆悉遠離惡神恐怖是故行者不應食肉如彼經說夫食肉者諸天遠離何況聖人是故菩薩為見聖人當修慈悲不應食肉大慧食肉

羅

朱九三

十五

之人睡眠亦苦起時亦苦若於夢中見種種
惡驚怖毛豎心常不安無慈心故乏諸善力
若其獨在空閑之處多為非人而伺其便虎
狼師子亦來伺求欲食其肉心常驚怖不得
安隱也 第九明食肉之人淨者尚不應食
況不淨肉是故行者不應食肉如彼經說我說

凡夫為求淨命噉於淨食尚應生心如子肉想
何況聽食非聖人食聖人離著以肉能生無
量諸過故失於出世一切功德云何言我聽
諸弟子食諸肉血不淨等味言我聽者是則
謗我故內律云食生肉血等得偷蘭遮罪
第十明食肉之人死則還生惡羅刹等中是

故行者不應食肉如彼經說食肉衆生依於
過去食肉重故多生羅刹師子虎狼豺狗猫
狸鴉鳥鷲鷲鷹鷂等中有命之類各自護身
不令得便受飢餓苦常生惡心念食他肉命
終復墮惡道受生人身難得何況當有得涅
槃道當知食肉有如是等無量諸過是故行

者不食肉者即是無量功德之聚也 又央
掘魔經云文殊師利白佛言世尊因如來藏
故諸佛不食肉耶佛言如是一切衆生無始
生死生生輪轉無非父母兄弟姊妹猶如伎
兒變易無常自肉他肉則是一肉是故諸佛
悉不食肉復告文殊一切衆生界我界即是

一界所肉之肉即是一肉是故諸佛悉不食
肉佛告文殊若自死牛牛主持皮用作革屣
施持戒人為應受不若不受者是比丘法若
受者非悲然不破戒以從展轉離殺因緣故
也 又此經說衆生身內有八十万戶虫若
斷一衆生命即斷八十万戶虫命若灸若煮

若淹若暴皆有小虫飛蛾蠅蛆而附近之如
是展轉傍殺無量生命雖不自手而殺然屠
者不敢自食皆為食肉之人殺之故知食肉
之人即兼有殺業之罪或有出家僧尼躬在
伽藍共諸白衣公然聚會飲酒食肉薰辛雜
穢汙染伽藍不愧尊顏如斯渾雜豈勝外道
羅 朱九三 十六

又尼羅浮陀地獄經云身如段肉無有識知此是何人皆由飲酒出家僧尼豈不深信經教心生重愧自棄正法同於外道若噉衆生父肉衆生亦噉父肉若噉衆生母肉衆生亦噉母肉如是姉兄弟妹男女六親並有相對怨怨相酬未可得脫 又沙弥尼戒經云不得殺生慈愍群生如父母念子加哀蠕動猶如赤子何謂不殺護身口意身不殺人畜喘息之類手亦不爲亦不教人見殺不食聞殺不食疑殺不食爲我殺不食口不說言當殺當害報怨亦不得言死快殺快其肉肥其肉瘦其肉多好其肉少惡意亦不念哀念衆生如己骨髓如父如母如子如身等無差別普等一心常志大乘 又賢愚經云佛告波斯匿王曰過去久遠阿僧祇劫此閻浮提有一大國名波羅奈於時國王名波羅摩達王將四種兵入山獵戲王到澤上馳逐禽獸單隻一乘獨到深林王時疲極下馬小休亦時林

中有特師子懷欲心盛行求其偶不能得值於林間見王獨坐婬意轉盛思欲從王近到其邊舉尾背住王知其意而自思惟此是猛獸力能殺我若不從意儻見危害王以怖故即從師子成欲事已師子還去諸兵群從已復來到王與人衆即還宮城今時師子從是懷胎日月滿足便生一子形盡似人唯足班爛師子憶識知是王有便銜擔來著於王前王亦思憶知是已兒即收取養以足班駁字爲班足養之漸大雄才志猛父王崩亡班足繼治時班足王有二夫人一是王種二是婆羅門種班足出遊勸二夫人隨我後往誰先到者當與一日極相娛樂其隨後者吾不見之王去之後其二夫人極自在飭嚴駕俱往到於道中見於天祠梵志種者下車作礼礼已後到王從本言而不前之於是夫人瞋怨天神由礼汝故使王見薄若有天力何不護我後壞天祠令平如地守天祠神悲惱至宮

欲傷王宮天神遮不聽入有一仙人住止山中王恒供養日日食時飛來入宮不食餽饌粗食麈供偶值一日仙人不來天神知之化作其形坐於常處不肯就食欲得魚肉即如語辨食已還去明舊仙來為設肉食仙人瞋王王言大仙先日勅作今何不食仙人語言昨日有患一日不來是誰語汝但相輕試令王是後十二年中恒食人肉作是語竟飛還山中是後厨監忘不辨肉臨時無計出外求肉見死小兒肥白在地念日稱急即却頭足擔至厨中加諸美藥作食與王王得食之覺美倍常即問厨監由來食肉未有斯美此是何肉厨監惶怖腹拍王前若王原罪乃敢實說王荅之言但實說之不問汝罪厨監白王具述前報王言此肉甚美自今已後如是求辨厨監白王前者偶值死兒更求叵得王又語言汝但密取設令有覺斷處由我厨監受赦夜恒密捕得便殺之日日供王於時城中人

民之類各各行哭云亡失兒展轉相問何由乃介諸臣聚議當試微伺即於街里處處安人見王厨監拽他小兒伺捕得之縛將詣王具以前事白王王言是我所赦諸臣懷恨各自外議王便是賊食我等子噉人之王云何共治當共除之去此禍害一切同心咸共齊謀一時同合即圍其王當取殺之王見兵集驚怖問言汝等何故而圍逼我諸臣荅言夫為王者養民為事方駟子厨殺人為食不任苦酷故欲殺王王語諸臣自今已後更不復為唯見恕放當自改勵諸臣語曰終不相放不須多云時王聞已自知必死即語諸臣雖當殺我小緩須臾聽我一言即自立誓我身由來所修善行為王正治供養仙人合集眾德迴令今日我得變成飛行羅刹其語已訖尋語而成即飛虛空告諸臣曰汝等合力欲強殺我賴我大幸復能自拔自今已後汝等好忍所愛妻兒我次第食語訖飛去止山林間

飛行搏人擔以為食人民之類恐怖截避如是之後殺噉多人諸羅刹輩附為翼從徒眾漸多所害轉廣後諸羅刹白班足王我等奉事為王願為一會王即許之當取諸王令滿五百與汝為會許之已訖一一往取閉著深山已得四百九十九王殘少一人後捕得須陀素弥王大有高德從羅刹王乞得七日假假滿還來須陀素弥廣為說法分別殺罪及其惡報復說慈心不殺之福班足歡喜敬戴為禮承用其教無復害心即放諸王各還本國須陀素弥即佐兵眾還將班足安置本國前仙人誓十二季滿自是已後更不敢人遂

早 朱九三

十九

多人食已得道當受報不佛告大王行必有報今此比丘在於房中地獄之火從毛孔出極患苦痛酸切叵言佛勅一比丘汝持戶排往指鬚房刺戶孔中比丘即往奉教為之排入戶內尋自融消比丘驚愕還來白佛佛告比丘行報如是王及眾會莫不信解 頌曰

財色與酒名為三惑 臣耽喪家 君重亡國 肉障大慈 辛遮淨德 懷道君子 斯穢不欲

法苑珠林卷第九十三

羅三

也吁鬼反漬浸即自反爛力開反駁補角反且果上芳無反 下子余反

法苑珠林卷第九十四

羅四

大唐上都西明寺沙門釋 道世撰

穢濁篇第九十四

感應緣 略引一十四驗

漢洛子淵

晉沙門法遇

晉庾紹之

宋蔣小德